

Thursday, January 22, 2026

Time - 2:30pm - 2:35pm

AKASHVANI AIZAWL

REGIONAL NEWS UNIT

CHIEF MINISTER

Chief Minister Pu Lalduhoma’n Mizoram chu ranvulhtute tan hmun tha tak ani tih sawiin ranvulh atanga tharchuah tipung turin tunlai thiamna leh khawl tha zawk nen intuaithar a tul thu a sawi.

Vawiin khan Chief Minister Conference Hall-ah Chief Minister Pu Lalduhoma leh Cooperation Minister Pu PC Vanlalruata te hmaah Mizoram Milk Producers Cooperation Union Limited (MULCO) leh National Dairy Development Board (NDDB) te chuan Mizorama bawnghnute tharchhuah leh sawngbawlina lam tihhmasawna tur thawhhona thuthlung (Memorandum of Understanding) an ziak a.

Chief Minister chuan inremna chuan bawnghnute tharchhuah kawngah a tanpui bakah ranvulh tute eizawna leh sum leh pai thawhchhuah a ti pung dawn tih sawiin Mizote chu ran vulhna hmun an neih that avangin tunlai thiamna nen intuaithar a pawimawh a ti a, Inremna chu chak taka kalpui a nih theih nan Project Monitoring Unit din a that tur thu a tarlang bawk.

Pu PC Vanlalruata, Minister pawhin thusawiin, India ram hmun hrang hranga sulhnu tha tak tak lo nei tawh NDDB nena an thawkho thei tur chu lawmawm atih thu sawiin cooperation lama hmalaknaah hma an sawn a beisei thu a sawi bawk.

Thawhhona tura inremna hi Mizoram sorkar aiawhin Pu Udit Rai Prakash chuan a ziak a, National Dairy Development Board aiawhin Pu S. Rajeev, Executive Director, NDDB in a ziak a, Mizoram Milk Producers Cooperation Union Limited (MULCO) aiawhin Pi Lalhmunliani, Managing Director chuan a ziak a ni.

National Dairy Development Board hian Ministry of Cooperation Flagship Scheme White Revolution 2.0 dung zuiin Mizoram state tan Comprehensive Dairy Development Plan a siam ang a, chumi ti hlawhtling tura Mizoram Milk Producers Cooperation Union Ltd te hmalakna tur a duang ang a, technical lam leh thil tul tinrengah NDDB hian a thawhpui dawn a ni.



ADVISER TO CM

Adviser to Chief Minister pahnih - Pu Lalmuanpuia Punte leh Dr. Lorrain Lalpekliana Chinzah ten Ranglong Khohui Cultural Festival, Ranglong mipui kut, Panisagar, North Tripura-a neih an hmanpui.

Zohnahthlak Ranglong mipuite kut ropui ber, ni 3 awh, 'Ranglong Khohui,' Panisagar, Tripura-a neih chu Mizoram atangin Adviser to CM pahnih ten vawiin khan an hmanpui a, Pu Lalmuanpuia Punte chuan ZPM sorkarin Zohnahthlak inpumkhatna leh inunauna a ngaipawimawh tih sawiin kut hlimawm tak an buatsaih avangin lawmawm atih thu a sawi a, Ranglong emaw, Zohnahthlak dang tute pawh

nise Mizo vek an ni tih sawiin Duhlian tawng hmang vek lo mahse Mizo an nihna a bo lo tih sawiin zohnahthlak unau vek an ni tih a sawi.

Thusawitu dang Dr. Lorrain Lalpekliaana Chinzah chuan, Ranglong Khohui ni 2-na, hnam inpumkhatna huna khual tha a ni thei chu lawmawm a tih thu sawiin Zohnahthlak inngeih tlang taka an awm ho thei chu lawmawm atih thu a sawi a, Ranglong unaunte chu hnam nun leh hnam ziarang vawng nung zel turin a chah bawk a ni.



MIZORAM TOURIST

Mizoram tlawhtu khualzin hrang hrang chuan Mizoram chu a mawina piahlamah mipui khawsak phung midangte inngaihsakna mawi tak chu chhuanawm an tih thu an sawi.

Tunhnai hunpui laia khualzin tam tak Mizorama lokal an awm hnuah rampawn atanga Mizoram tlawhtu an awm belh zel a, Akashvani palaiin nimina Solomon Temple tlawhtu a kawmna ah khualzinte chuan Mizoram boruak muanawm tak hnuaia Mipui khawsak phung mawi tak leh midangte inngaihsakna chu hmun danga an hmuh ngailoh anih thu an sawi a, hmeichhe tan pawh hmun him leh nuam anih thu sawiin chawlh hun hmanna nuam tak anih thu an sawi.

Khualzin te sawi danin Mizoram chu hmun nuam ni tawh mahse tuna a dinhmun aia hmasawnna tur tam tak an awm thu a sawi a, a thianghlimna, midangte inzahtawhnna leh dikna an duhna chu an chhawm nun zel chuan state hrang hrang zingah khualzin tam berna pawl an ni thei tih an sawi a ni.



MAMB PRESS CONFERENCE

Mizoram sawrkarin thla thar February ni 2 atangin kuthnathawktu te tan a thlai thar lei leh hralh a kalpui tan dawn.

He thu hi vawiina Mizoram Agricultural Marketing Board (MAMB) in Aizawl Press Club a thuthar thehdarhtute an kawmnaah an sawi a, sorkar chuan kuthnathawktute thar chhuah thlai thar chi 5 - Sawhthing, Aieng hring, Hmarchate ro, Hmunphiah ro leh Mizo buh hum te a lei sak dawn a, Sawhthing ah minimum rate chu kg 1 cheng 50 zel a ni a, support price chu kumin February ni 2 atanga May ni 30 thleng an pe dawn a ni. Aieng hring minimum rate chu kg 1 ah cheng 20 a ni a, hmarchate ro minimum rate chu kg 1 ah cheng 350 a ni a, Aieng hring leh hmarchate ro support price chu February ni 2 atanga April thla thleng pek a ni dawn a, Hmunphiah ro minimum rate chu kg 1 ah cheng 80 niin support price chu February ni 2 atanga March thla thleng a pe dawn a, Mizo buh hum minimum rate chu kg ah cheng 30 niin, nikum November thla atanga kumin January thla kal mek thleng an lei sak bawka ni.

MAMB hotute sawi danin nikum ang lo takin kuminah sawhthing lei hun tura ruat a thlen hmain sawhthing lei tura rawn ngaihven company engemaw zat an awm

a; Gulf ram atanga rawn lei tur company pakhat chu MoU ziahpui tawh niin, anni hian retail-a hralh tur quintal 2000 leh sawngbawl tur quintal 10000 lei turin MAMB nen inremna an ziaak tawh a ni.

Hetihrual hian sawhthing man (rate) ala chet ve reng avangin a man san hun deuh nghah mek a ni a, kar liamta khan chawhrualin kg ah cheng 54 vel a ni a, hei vang hian MAMB chuan company dangte chu sawhthing man ala chet reng avangin MoU a la ziahpui duh rih lova, Gulf company pawh hi a rate la fillup leh turin MoU ziahpui an ni.



REPUBLIC DAY MEGA FAIR

Akashvani Aizawl leh AZ Events chuan Republic Day pualin Mega Fair (bazar pui) Millennium Centre chung zawlah a buatsaih dawn.

Republic Day puala Mega Fair (Bazar pui) hi naktuk atanga hawn tan tur niin tun thla January ni 28 inkarah Millennium Centre chungzawl exhibition hall ah nitin zing dar 10 atanga tlai dar 5 thleng thil chi hrang hrang zawrhna leh intihhlimna bakah ei leh in tur te a awm dawn a ni.

Akashvani Aizawl leh AZ Events chuan Bazar pui buatsaih tlawh tur hian mipui zawng zawng a sawm a ni.

